

清·方略館 編

清代 方略 全書

北京圖書館出版社



清代方略全書

一六五

清·方略館
編

北京圖書館出版社

清·奕訢等撰

欽定剿平捻匪方略

卷二五三——二六二

清同治十一年（一八七二）鉛印本

欽定剿平捻匪方略

PDG

欽定剿平捻匪方略卷二百五十三

丙寅年



三月十六日 乙亥 吳昌壽奏言賴牛各逆自皖境

阜陽全數折回於三月初一二等日紛竄沈邱
項城鹿邑淮甯太康等屬初四日直撲扶溝縣
城知縣鄒金生督勇開礮轟斃馬步賊匪數十
名該逆竄向西華通許陳留尉氏一帶攻撲城
關經各該地方官隨時開礮擊退殲斃逆黨多

名該逆勢趨省城臣督同司道官調齊兵練嚴
密設防一面飭善慶率領馬隊馬德昭率領步
隊紮營省城大隄以外仍多張旗幟以爲疑兵
初六日賊竄祥符朱仙鎮馬德昭善慶等派隊
迎勦擊斃馬賊數十名餘黨折向南遁復由南
而西直撲中牟縣城經馬德昭善慶所派各軍
趕到會合進勦賊不能支登時潰散向中牟西

北逸去現踞鄭州白沙一帶查逆衆不下數萬人現旣擾及中牟鄭州黃河工次及鞏洛情形同時喫緊臣先期檄令副將崔廷桂分撥兵勇扼防虎牢關杜其西竄飭將所帶礮船在河流上下梭巡又檄李世玉等四營步隊馳紮楊橋專防渡口仍將河內船隻一律提歸北岸惟逆勢狡猾省城現存隊伍不敷勦辦臣已飛調宋

慶蔣希夷等率領所部與安住保英各軍迅由東路折回以便認真剿擊殄此兇鋒

吳昌壽又奏言又據探報賊股已自中牟一帶回駛馬賊繞至省城以南當經派隊截擊略有斬擒賊之大股向朱仙鎮一帶竄駛一面派隊緊追並確探賊蹤竄踞何方再令東路調回各隊繞前迎剿奏入

上命軍機大臣傳諭曾國藩閻敬銘李鶴年吳昌壽
王榕吉曰賴牛股匪行蹤飄忽勢甚狡猾汴省現
存隊伍不敷分剿甚屬可虞著吳昌壽將城守事
宜嚴密布置飭馬德昭等軍相機追擊一面迅催
宋慶蔣希夷安任保英等軍趕緊由東路折回探
明賊蹤繞前迎剿賊竄朱仙鎮難保不東趨曹濟
與張總愚合股曾國藩務當分撥各軍與豫軍截

擊勿令得遂其合併之計致成燎原直隸大名邊境與開封接壤尤須防其窺伺黃河希圖北渡著劉長佑添派兵勇與在防將士實力堵遏勿少疏懈閩敬銘會商曾國藩將黃運兩河要隘力籌防守毋得稍有疏虞山西澤潞等處本有防兵王榕吉仍當先事圖維豫爲戒備不得以賊蹤尙遠稍涉疏虞前據喬松年奏賊匪回竄豫境已飭張得

勝程文炳等軍會合劉銘傳追擊卽著曾國藩檄
令劉銘傳等確探賊蹤迅速追剿盡殄賊氛李鶴
年如已到豫卽著懷遵前旨妥籌防剿

十七日

丙子

劉長佑奏言據總兵陳濟清等稟報

張逆被剿由鄆城竄踞梁山營三月初八初九
等日分股擾及宋家樓沈家口等處意在擄船
搶渡疊經該總兵等督飭師船開礮擊退又據

臬司陳鳴志稟稱張逆疊被南路官兵兜剿悉
竄范縣壽張一帶勢猖獗總兵余承恩咨請
添隊協防陳鳴志現由開州帶隊馳赴東路會
督堵剿旋據探報賴逆一股由皖省回竄河南
已近汴省並據獲賊供稱該逆亦思竄往山東
等語賴張二逆勢將合股直隸河路縣長東西
兼顧防務尤爲喫重臣現擬於十九日先將調

回省標馬步官兵酌撥數百名隨帶出省仍赴
大名就近調度督率水陸各營嚴加堵扼相機
截剿奏入

上諭曰著卽懷遵疊次諭旨督率在防文武員弁嚴
加堵禦相機截剿毋稍疏懈

同日賈鐸奏言賴張兩逆往來奔突流毒無窮
現雖大兵雲集而此剿彼竄幾無了期臣謹擬

四策爲我

皇上敬陳之一嚴守汴省東西要路以防北犯也查

捻匪欲渡黃河竄擾彰衛懷三府必走鄭州滎

澤一路欲竄山東曹濟必走蘭儀考城暨永城

夏邑兩路刻下張逆大股雖到山東迨官兵調

齊必又回竄河南請

旨飭下曾國藩俟該匪竄回豫省後卽督帶重兵移

紮汴省西南鄭州許州等處以便調度其汴省
東北一面請

飭山東巡撫閻敬銘臬司潘鼎新帶兵分駐曹考等
處認真防守儻恐兵力單薄不敷堵剿再

飭下河道總督張之萬直隸總督劉長佑各撥兵將
分駐要隘以爲援應斯賊匪不能北犯而直東
兩省均獲平安矣一扼守淮河以杜南竄也查

淮爲四瀆之一由南陽桐柏發源經汝光新息
及安徽阜陽霍邱等處東西縣延數百里水勢
浩大非船不能偷渡請

旨飭下李鶴年喬松年分駐淮河南岸親督馬德昭
蔣希夷張得勝等各統大兵會同沿淮之道府
州縣各帶團勇嚴密布置所有各處渡口斟酌
歸併一聞警信卽將渡船調回南岸毋令賊匪

搶渡儻防淮兵力不足再請

飭令湖北巡撫遣將撥兵分紮南汝光一帶以爲後
路聲援斯賊匪不能南竄而淮南各府以及楚
皖邊境均保無虞矣一東西兩路夾擊以遏其
鋒也南北兩面堵截旣嚴賊情狡譎必爲東西
分竄之計須兩路夾擊方可盡殄醜類請

旨飭曾國藩督調劉銘傳周盛波李昭慶等各帶所

部由歸陳一路向西進剿並飛催鮑超速帶大
兵從荆襄北上會合豫將宋慶一軍由南陽汝
州一路向東進剿斯賊匪無路可逃不難一鼓
蕩平矣一多張告示以散其黨也查賴逆張逆
死黨均不過數千人其餘裹脅之徒多出於萬
不得已並非甘心從賊若當被剿窮蹙之時多
張告示詳爲開導令其自拔來歸概從寬免擒